

Unione pro Latino Internationale Comitatu Linguistico

Circulare N° 3

Bruxelles, 20 julio 1912

Resultatus de votationes

1. Regulamento propositu in Circulare N° 1 es approbato ab S^{res} Actis, Autschbach, Basso, Creux, Hartl, Meysmans, Moore, Peano et Rosenberger (9 ex 10 miembros de Comitatu). S^{re} Bernhaupt acceptat Regulamento, sed proponit additiones que me publica ^(in principio) in praesente ^(proposito) Circulare.

Me declara adoptato Regulamento propositu.

2. Adoptio provisoria de principio linguistico de Academia pro Interlingua (propositio de Circulare 1) es approbato ab S^{res} Actis, Autschbach, Basso, Creux, Hartl, Meysmans, Moore, Peano et Rosenberger (9 ex 10 miembros).

Secundum Regulamento, propositio approbato ab maiori parte de Comitatu (6 miembros) es adoptato ab Comitatu.

Ergo propositio es adoptato ab Comitatu.

3. Propositiones A. B. et C. de Circulare 2 es approbato ab S^{res} Actis, Autschbach, Basso, Creux, Hartl, Meysmans, Moore et Rosenberger (8 miembros). Ergo, isto propositiones es adoptato ab Comitatu.

S^{re} Prof. Peano abstine se ab voto; ut director de Academia pro Interlingua illo vole restare neutro in quaestione que es nunc in deliberatione in Academia.

S^{re} Autschbach, inspirato ab idea de unione, retrahit suo propositione (publicato in Circulare 2); isto propositione es approbato ab S^{res} Actis et Bernhaupt.

Novo propositiones

Post solutione de quaestione de Vocabulario, nos pote transire ad examine de quaestione de Orthographia.

Principio de Academia in isto quaestione es que vocabulos internationale es reproductu sub forma de "thema latino". Me crede que Comitatu vole conservare isto excellenti principio. Sed es necessario que nos adopta definitione de thema latino. Multo personas, etiam docto, non sci in modo exacto quid es thema latino.

Me propone definire thema latino per regulas sequente, que es conforme ad bono consilios dato in publicationes de S^{res} Peano, Fixell, Basso et Bernkaupt.

Propositione 1. - Thema latino de nomines (substantivos, adjectivos et pronomines) es identico ad suo ablativo singulare latino, excepto que desinentia i de ablativo es mutato in e.

Ex. rosa, domino, templo, amore, tribu, die
illo, isto, bono, paupere, vetere, se,
celebre, breve, mare, nave.

Propositione 2. - Thema de verbos corresponde ad suo imperativo latino (2^o persona singulare), suppresso desinentia re de imperativo deponente.

Ex. ama, time, lege, audi,
imita, revere, seque, menti.

Propositione 3. - Vocabulos invariabile de latino es reproducto sine alteratione.

Ex. in, ex, ab, de.

Propositione 4. - Vocabulos terminato per suffixo ma es citato sub forma de nominativo latino.

Ex. thema, drama.

Propositione 5. - Forma de nominativo latino es etiam adoptato pro paucos pronomines sequente: duo, tres, nos, vos, id, idem, nihil, nemo, quis, quid. Thema de latino qui, quae, quod es que.

Propositione 6. - Lice conservare desinentia i de ablativo latino in vocabulos que habe isto desinentia (aut is) in linguas moderno.

Ex. oasi, analisi.

Esse possibile adoptare ullo vocabulos sub duo formas: nomine et nomen, homine et homo, etc. Sic nos obtinerè, in aliquo casus, forma plus breve. Sed isto oeconomia (caeterum raro) de litteras es minimo commoditate, dum duplicitate de regula produce difficultate pratico et complica mecha-

nismo de lingua, nam discipulos haesita an illos debe dicere leo aut leone, sol aut sole, etc (Vide Discussiones II, p. 68). In propaganda popolare, que nostro societate vole facere, es meliore evitare omne exceptione non necessario.

Me recipe ab miembros de Unione propositiones sequente:

Propositione 7. - Me propone abrogare regula que permittit mutare ph in f et th in f. Isto regula non plus es applicato ab Interlinguistas. (Ab S^{re} Devuyst)

Propositione 8. - Me propone annullare regula que permittit supprimere vocale finale de thema latino. Isto regula, non applicato in generale, es contrario ad bellitudine et harmonia de lingua. (Ab S^{re} VanBaerlem)

Propositione 9. - Lice substituere K ad c (excepto ante e et i). (S^{re} J. Bernhaupt)

Ex. Kultura (cultura); Kontra (contra).

Propositione 10. - Lice supprimere uno de duo consonantes successive. (S^{re} J. Bernhaupt)

Ex. Komunale (communale); litera (littera); ilo (illo).

S^{re} Bernhaupt praesentat propositiones sequente:

Propositione 11. - Omne parte de gramatica de S^{res} Basso, Bernhaupt, Barth, Meysmans, Peano et Rosenberger, equale in minime proportione de 2:1, es acceptato quale propositione de Comitatu.

Propositione 12. - Propositione adoptato ab Comitatu non pote es reviso intra 6 menses de suo adoptione. (Nota de Directore: Isto propositione es forsan bono, sed me puta illo praematurato; nos es in primo periodo de deliberatione; es possibile que continuatione de nostro labore obliga nos ad mutare subito propositione jam adoptato).

Me preca miembros de Comitatu mittere suo voto concernente propositiones supradicto, tam cito quam possibile. -

Directore de Comitatu:

J. Meysmans,
Woluwe-St-Pierre, Bruxelles (Belgio).